

e agalelei ma amio mama. Sa faia e faifeautalai a'u lesona ma valaaulaia a'u ou te papatiso, peitai o *oe* o lo'u faifeautalai lona tolu. Sa e totoina se fatu e ala i au taga, ma na e faaleleia moni lava lo'u olaga. Ua i ai nei so'u aiga e faavavau. O le a ola a'e la'u fanau ua iloa le atoaga o le talalelei. O le faamanuiaga silisili e mafai ona maua e soo se tasi o i tatou. Sa e fesoasoani e aumaia lena mea i lo'u olaga."

Ina ua ou faafesoota'ia o ia, na faamatala ai e Kristi, "O nisi taimi tatou te manatu tatou te faalogo i le lisi o uiga faaleatua o loo ootoo mai i le mataupu faavae lona sefulutolu o le faatuatua, ma tatou lagona ai le lofituina. Peitai, ou te iloa a tatou ola ai i nei tulaga faatonuina ma taumafai e mulimuli i le faataitaiga a Keriso, e mafai ona tatou faia se eseeseaga. . . . Ou te lagona e faapei o Amona i le Alema 26:3 ina ua ia fai mai, 'O le manuia foi lenei ua foaiina mai ia te i tatou, aua ua faia i tatou ma tufuga-aao o le Atua e faataunuu a'i lenei galuega tele.'"

Ou te tatalo ia le gata ina tofu faapu mai e outou "Ou te talitonu ua faamaoni ma amiotonu," ae o le a outou tautino atu foi e ola ai i lena folafolaga i aso taitasi ma aso uma. Ou te tatalo a outou faia lenei mea, o le a lagolagoina outou e le malosi, alofa ma faamanuiaga a le Tama Faalelagi, e faia ai mea sa auina mai outou iinei e fai. Ou te fai atu ai nei mea i le suafa o Iesu Keriso, amene. ■

#### FAAMATALAGA

1. Thomas S. Monson, "Toe Tepa i Tua ma Agai i Luma," *Liahona*, Me 2008, 90.
2. *Faamaoni i le Faatuatua* (2004), 49–50.
3. Tagai Esoto 14:15–22.
4. *Mataupu o le Talalelei* (2009), 140–49.
5. Howard W. Hunter, "Basic Concepts of Honesty," *New Era*, Feb. 1978, 4, 5.
6. William J. Scott, "Forgot to Look Up," *Scott's Monthly Magazine*, Dec. 1867, 953.
7. Tagai *Merriam-Webster's Collegiate Dictionary*, 11th ed. (2003), "true."
8. Charlotte Brontë, *Jane Eyre* (2003), 356.



**Saunia e Mary N. Cook**

Fesoasoani Muamua i le Au Peresitene Aoao o Tamaitai Talavou

## "Ia Manatua le Mea Lenei: O Le Agalelei e Amata Ia te A'u"

*O le a e vaai ai o le agalelei e mafai ona aumai ai le olioli ma le lotogatasi i lou aiga, lau vasega, lau uarota, ma lau aoga.*

O ni nai vaiaso ua tea, sa ou aoaoina ai se lesona taua mai se tamaitai o le Lora o le failauga talavou i la'u uarota. Sa faagaetia a'u a o ia aoao mai ma molimau mai ma le mautinoa e uiga ia Iesu Keriso. Sa faaiuina lana tautalaga i le faamatalaga lenei: "A ou faaogatonuina Iesu Keriso i lo'u olaga, e lelei lava lo'u aso, ou te agalelei atu i e pele ia te a'u, ma e faatumulia a'u i le fiafia."

Sa ou matauina lava lenei tamaitai talavou i ana fegalegaleaiga i nai masina ua mavae. Na te faafeiloaia tagata uma i ni foliga fiafia ma vave ataata. Sa ou vaai i lona fiafia i le faamanuiaina o isi talavou. Na faamatala lata mai nei e ni Maea Meite se tolu faaiuga a lenei tamaitai talavou e faaleaogaina ana pepa ulufale i se tifaga ina ua ia iloina o le a le o se aafiaga e "mama ma matagofie."<sup>1</sup> O ia o se tagata alofa, agalelei, ma usiusitai. E sau o ia mai i se aiga e na o se tina, ma o lona olaga e le'i faapea na leai ni luitau, o lea sa ou mafaufau ai pe faapefea ona ia faatumauina lona agaga fiafia ma le agalelei. Ina ua molimau

mai lenei tamaitai, "Ou te faaogatonuina lo'u olaga ia Iesu Keriso," na ou iloa ai le tali.

"Matou te talitonu ia faamaoni, amiotonu, nofo mama, agalelei, amio mama, ma le faia o mea lelei i tagata uma." O lenei lisi matagofie o uiga faaKeriso, o loo maua i le mataupu faavae lona sefulutolu o le faatuatua, o le a saunia ai i tatou mo faamanuiaga o le malumalu ma le ola e faavavau.

E na o le tasi le upu o na upu ou te fia faamamafaina—*agalelei*. *O le agalelei* o se upu matagofie e seāseā tatou faalogo i ai. O ona aa e mai Latina o lona uiga "o le faamanuia atu i se tasi."<sup>2</sup> Ina ia agalelei, o lona uiga ia agaalofo, ia i ai ni faamoemoega lelei, ma ia loto alofa. O le toatele o outou na outou iloa le uiga o le agalelei a o outou i ai i le Peraimeri ma taulotoina ai le pese lenei:

*Ou te fia alofa i soo se tasi, Aua e tonu lea.*

*Ou te faapea ifo "Ia manatua: [O le agalelei] e amata ia a'u."*<sup>3</sup>



Sa aoao mai i tatou e lo tatou Faaola, ma sa soifua foi i se soifuaga agalelei. Sa alofa ma auauna atu Iesu i tagata uma. O le faaogatonu o o tatou olaga ia Iesu Keriso, o le a fesoasoani tatou te maua ai lenei uiga o le agalelei. Ina ia tatou atiina ae nei lava uiga faa-Keriso, e tatau ona tatou aoao e uiga i le Faaola ma “mulimuli i Ona ala.”<sup>4</sup>

Mai le faataoto i le Samaria agalelei, ua tatou aoao ai e tatau ona tatou alofofa atu i tagata uma. E amata le tala i le Luka mataupu e 10, ina ua fesili atu se aoao tulafono i le Faaola, “Se a se mea ou te faia ina ia ou maua ai le ola e faavavau?”

Na tali le Faaola: “E te alofa atu i le Alii lou Atua ma lou loto atoa, ma lou agaga atoa, ma lou malosi atoa, ma lou manatu atoa; e te alofa atu foi i le lua te tuaoi, ia pei o oe lava ia te oe.”

Ona fesili atu lea o le aoao tulafono, “O ai foi le tagata ma te tuaoi?” O se fesili malie lena e fesili ai se aoao tulafono, aua o tagata Iutaia sa i ai o latou tuaoi i le itu i matu, o tagata Samaria, lea latou te matuai inoino i ai,

ma a latou malaga mai Ierusalem e agai atu i Kalilaia, latou te ui i le auala e mamao atu lea e ui atu i le Vanu o Ioritana nai lo le ui atu i Samaria.

Na tali atu Iesu i le fesili a le aoao tulafono i le faamatalaina o le faataoto i le Samaria agalelei. E tusa ai ma le faataoto:

“O se tasi tagata na alu ifo mai Ierusalem i Ieriko, ua maua o ia e tagata fao mea, ua latou toeseina ona ofu, ma fasi ia te ia, ua latou o, ua tuua ia ua tali oti. . . .

“A o le tasi Samaria ua alu lana malaga, ua oo atu i le mea o i ai o ia, ua iloa o ia, ona mutimutivale lea o lona alofa,

“Ua alu atu ma nonoa i ona manua, ua liligi foi i ai le suauu ma le uaina, ua faatietie ia te ia i lana lava manu, ma taitai ia te ia i le fale e tali ai malo, ma tausi ia te ia.

“O le taeao o le a alu ia, ona to ae lea o tenari e lua, ma avatu i le matai e ona le fale, ua fai atu ia te ia, Ina e tausi ia te ia; ai se mea e te toe faatau ai, ou te tau ai ia te oe pe a ou toe sau.”<sup>5</sup>

E le pei o le faitaulaga Iutaia ma le sa Levi o e na laaloa ma le tagata manua, o se tasi lava o lo latou ituaiga, sa agalelei le tagata Samaria e ui lava i o latou feeseeseaiga. Sa ia faaalua le uiga faa-Keriso o le agalelei. Ua aoaoina i tatou e Iesu e ala i lenei tala e faapea, o tagata uma lava o o tatou tuaoi ia.

Na faasoa lata mai nei e se fesoasoani o le au epikopo se aafiaga na aoao mai ai le taua o tuaoi taitoatasi. A o vaavaai atu o ia i le aulotu, sa ia vaaia ai se tamaitiiti ma se atigipusa tele o vali na tumu i lanu eseese. A o vaavaai atu o ia i tagata e toatele o lana uarota, sa ia manatua ai, e pei foi o vali, na foliga tutusa uma i latou, ae sa tulaga ese tagata taitoatasi.

Sa ia faapea atu, “O le ata lafoia latou te aumaia i le uarota ma le lalolagi o a latou uma lava ia. . . . E tofu i latou taitoatasi ma malosiaga ma vaivaiga, moomooga a le tagata lava ia, ma miti patino. Ae a tuu faatasi latou te tuufaatasia ai se uili o lanu o le lotogatasi faaleagaga. . . .

“O le lotogatasi o se uiga faaleagaga. O lagona matagofie o le toafilemu ma le faamoemoega lea e sau mai le i ai i se aiga. . . . O le manao i le mea e sili mo isi e pei foi ona e manao ai mo oe lava. . . . O le iloaia e leai se isi o taumafai e faaleaga oe. [O lona uiga o le a le tuua lava na o oe.]”<sup>6</sup>

Tatou te fausia lena lotogatasi ma fetufaai o tatou lanu tulaga ese e ala i le agalelei: o faatinoga taitasi o le agaalofoa.

Pe sa e lagonaina ea le tuua toatasi? O e matauina ea i latou ua tuua toatasi, o loo ola i se lalolagi faanoanoa ma le le fiafia? Tamaitai talavou, ua ou vaai a o e aumaia lau lanu tulaga ese i olaga o isi e ala i ou foliga ataata, i au upu alofa, po o se upu faalaeiau.

Na aoao i tatou e Peresitene Thomas S. Monson i auala tatou te



feoeoa'i ai ma o tatou tupulaga ma tagata uma tatou te fetau, ina ua ia ta'u atu i tamaitai talavou o le Ekalesia, "O'u tuafafine talavou faapelepele, ou te aioi atu ia te outou ia outou lototele e o ese mai le faamasino atu ma le faitioina o i latou e siomia outou, faapea foi ma le lototele ia mautinoa ai o loo aofia tagata uma ma [latou] lagona ina le alofaina ma le faatauaina."<sup>7</sup>

E mafai ona tatou mulimuli i le faataitaiga a le Samaria agalelei, ma "sui le lalolagi" a se tagata e toatasi e ala i le agalelei.<sup>8</sup> Ou te valaaulia outou taitoatasi e fai se galuega faa-Samaria i le vaiaso a sau nei. E ono manaomia ai lou aapa atu i tua atu o au uo masani, po o le faatoilaloina o lou matamuli. E te ono filifili ma le lototele e auauna atu i se tasi e le lelei lona faia o oe. Ou te folafola atu, afai o le a e faalatele atu au mea e fai nai lo mea e faigofie ona fai, o le a e lagona le fiafia i lou loto ma o le a avea le agalelei o se vaega o lou olaga i aso uma. O le a e vaaia ai o le agalelei e mafai ona aumai ai le olioli ma le lotogatasi i lou aiga, lau vasega, lau uarota, ma lau aoga. "Ia manatua le mea lenei: o le agalelei e amata ia te a'u."

Sa le'i gata ina alofa lo tatou Faaola i tagata uma; ae sa Ia auauna atu foi i tagata uma. Ia faalatele atu lou agalelei i tagata e toatele. O le a mafai ona faamanuiaina tagata matutua ma e laiti i au auaunaga agalelei. O Peresitene Monson, talu mai i lona

talavou, o loo i ai se avanoa faapitoa i lona fatu mo e matutua. Na te silafia le taua o se asiasiga puupuu, o se ataata po o se oomi o se lima ua vaivai ma maanuminumi. O faatinoga faatauavaa faapena o le agaalofoa e aumai ai le fiafia i se olaga lea e i ai taimi e maua mai i ni aso uumi, tuua toatasi ma le faanoanoa. Ou te valaaulia outou taitoatasi ia magafagafa i o outou matua matutua ma tagata ua matutua. Vaavaai solo i le lotu a taeao po o ai se tagata matua e mafai ona ia faaogaina ou uiga agalelei e faaopoopo atu i o latou olaga. E le tele ni mea e manaomia ai: faafeiloai i latou i o latou igoa, fai sina talanoaga puupuu, ia e avanoa e fesoasoani atu ia i latou. Pe mafai ona outou tatalaina se faitotoa pe ofo atu e fesoasoani i lo latou fale po o le togalaau? O se galuega faigofie ia te oe i lou matua i le taimi nei, e mafai ona avea o se galuega lofituina mo se tagata matua atu. "Ia manatua le mea lenei: o le agalelei e amata ia te a'u."

O nisi taimi o le avea ma se tagata agalelei e sili ona faigata i o tatou lava aiga. O aiga malolosi e manaomia ai taumafaiga. "Ia agaga fiafia, loto fesoasoani, ma manatu i isi tagata. O le tele o faafitauli i le aiga e mafua ona o le tautatala ma le faia e tagata o le aiga o mea manatu faapito po o le le agalelei. Ia e manatu popole i manaoga o isi tagata o lou aiga. Taumafai ia avea oe ma se tagata e faatupuina le filemu nai

lo le taufaafilili, tauaimisa, ma feupuai."<sup>9</sup> "Ia manatua le mea lenei: o le agalelei e amata ia te a'u."

Sa alofa Iesu i tamaiti, sa Ia siiina i latou, ma faamanuia i latou.<sup>10</sup> E pei foi o le Faaola, e mafai ona e faamanuiaina ai tamaiti uma i lou agalelei, e le na o tamaiti o lou aiga.

Atonu e te le iloa le aafiaga o lou olaga ma faataitaiga e te ono faia i se tamaitiiti laitiiti. Sa ou mauaina talu ai nei se tusi puupuu lenei mai se uo o loo puleaina se aoga faataitai i se aoga maualuga i le lotoifale. E aoga ai i lena aoga maualuga nisi o alii ma tamaitai talavou o le Ekalesia. Sa ia faasoa maia ia te au le aafiaga lenei: "A matou savalivali atu ma tamaiti laiti i fale faafiafia tetele, e ese le manaia o le vaaia o le tele o kapoti loka e i ai ata o Iesu po o malumalu e faapipiina ai i totonu o faitotoa. Na vaaia e se tasi o tamaitiiti se ata o Iesu i le pito i totonu o le faitotoa o le loka na matala a se [tamaitai talavou] ma fai mai, 'Vaaia foi, o loo i ai Iesu i le tatou aoga!' Na ootia le teineitiiti aoga ma maligi ona loimata a o ia punou ifo ma opo lea tamaitiiti. Ou te faafetai i le tamaitai talavou mo le faataitaiga lelei sa avea ai o ia i isi na siomia o ia. E faagaetia lava le iloa e toatele tagata talavou o loo taumafai e tutu atu mo le upumoni ma le amiotonu ma fai la latou vaega i le valaauliaina o le Agaga i o latou olaga, e ui lava e i ai taimi e faigata ai, ona o le malomaloa ma le vāvāo o le lalolagi o loo siomia i latou. O loo i ai ni o tatou talavou lelei i le Ekalesia."

O lo'u manatu moni foi lena! Tamaitai talavou, o loo *outou* suia le lalolagi e ala i le faaogatotonuina o lou olaga ia Iesu Keriso, ma ua "avea ai outou ma ituaiga tagata ua finagalo o Ia e avea ai outou."<sup>11</sup>

Faafetai mo o outou olaga agalelei; mo le faaafolia ai o i latou o e atonu e ese mai; mo lo outou agalelei i a

outou tupulaga, i tagata matutua, i lou aiga, ma tamaiti laiti; mo le avea ma ni tuaoi ia i latou o e tuua toatasi ma i latou o loo i ai ni luitau ma lotu mafatia. E ala i lou agalelei, o loo outou “faasino atu ai [isi] i le malamalama o le Faaola.”<sup>12</sup> Faafetai lava mo le manatuaina “o le agalelei e amata ia te a’u.”

Ou te iloa o Peresitene Thomas S. Monson o se perofeta a le Atua, o lona soifuaga o se faataitaiga o le agalelei e mafai ona tatou aoao mai ai. Mulimuli i lo tatou perofeta. Aoao mai i ana faataitaiga ma faalogo i ana upu. Ou te talitonu i le talalelei a Iesu Keriso, ma ou te iloa na toefuatai mai le perisitua i le lalolagi e ala mai ia Iosefa Samita.

Ou te iloa o loo soifua lo tatou Faaola ma e alofa ia i tatou taitoatasi. Ua Ia tuuina mai Lona soifua mo i tatou uma. Ou te tatalo ia tatou faagatonu o tatou olaga ia Iesu Keriso, ma “mulimuli i Ona ala” e ala i le agaalofo ma auauna atu o le tasi i le isi.<sup>13</sup> O le faia o ia mea, ou te iloa e mafai ona tatou faia ai le lalolagi o se nofoaga e sili atu ona lelei aua, “tatou te talitonu ia . . . agalelei.”<sup>14</sup> Ou te molimau atu ai i le suafa o Iesu Keriso, amene. ■

#### FAAMATALAGA

1. Tagai Mataupu Faavae o le Faatuatua 1:13.
2. Tagai *Oxford English Dictionary Online*, 2nd ed. (1989), “benevolent,” oed.com.
3. “O Le Agalelei e Amata ia te Au,” *Tusipese a Tamaiti*, 83.
4. “Guardians of Virtue,” *Strength of Youth Media 2011: We Believe* (DVD, 2010); o loo maua foi i le [lds.org/youth/video/youth-theme-2011-we-believe](http://lds.org/youth/video/youth-theme-2011-we-believe).
5. Luka 10:25, 27, 29, 30, 33–35.
6. Jerry Earl Johnston, “The Unity in a Ward’s Uniqueness,” *Mormon Times*, Feb. 9, 2011, M1, M12.
7. Thomas S. Monson, “Ia Outou lototetele,” *Liahona*, Me 2009, 89.
8. “Guardians of Virtue.”
9. *Mo Le Malosi o le Aulavou* (tamaitusi, 2001), 10.
10. Tagai Mareko 10:16.
11. “Guardians of Virtue.”
12. “Guardians of Virtue.”
13. “Guardians of Virtue.”
14. Mataupu Faavae o le Faatuatua 1:13.



**Saunia e Elaine S. Dalton**

Peresitene o Tamaitai Talavou

## Leoleo o le Mamā

*Sauniuni nei ina ia mafai ona outou agavaa mo le mauaina o faamanuiaga uma o loo faatalitali mai mo outou i malumalu paia o le Alii.*

E i ai taimi e le mafai ai e upu ona faamatala o tatou lagona. Ou te tatalo ia molimauina e le Agaga i o outou lotu lou faasinomaga faalelagi ma lou tiutetauave e faavavau. O outou o le faamoemoe o Isaraelu. O outou o afafine filifilia tautupu o loo tatou Tama Faalelagi alofa.

O le masina ua mavae, sa ou maua ai le avanoa e auai i le faaipoipoga i le malumalu, o se tamaitai talavou sa ou iloina talu ona fanau mai o ia. A o ou nofo i le potu mo faamauga, ma matamata i le moli tautau matagofie ua fe’ilafi i sulu o le malumalu, sa ou manatuaina lena aso na faatoa ou si’i ina ai o ia. Sa faaofu o ia e lona tina i se tama’i ofu paepae ma sa ou manatu o ia o se tasi o pepe e aupito sili ona lalelei ua ou vaai i ai. Ona savali mai ai lea o lea tamaitai talavou i le faitotoa, ua toe ofu paepae foi. Sa susulu o ia ma le fiafia. A o ulufale mai i le potu, sa ou moomoo ma lo’u lotu atoa maimau e pe ana vaai tamaitai talavou uma i lena taimi, ma taumafai ai pea lava pea ia agavaa e faia ma tausia feagaiga paia ma maua ia sauniga o le malumalu e saunia ai e olioli i faamanuiaga o le faaeaga.

Ina ua tootutuli ifo lenei ulugalii i le fatafaitaulaga paia, sa la mauaina folafolaga e le oo i ai le malamalama

faaleolaga nei, o le a faamanuiaina ai, faamalolosia, ma fesoasoani ai i la la’ua malaga i le tino nei. O se tasi lea o taimi e tutu faasasa’o ai le lalolagi ae patipatia e le lagi uma. A o tilotilo atu le ulugalii fou i faaata tetele i totonu o le potu, sa fesiligia le alii faaipoipo po o le a le mea la e vaai i ai. Fai mai a ia, “O o’u augatuaa uma na muamua atu ia te au.” Ona tilotilo lea o le ulugalii i le faaata tele i le puipui i le isi itu, ona fai mai lea o le tamaitai ma ona loimata, “Ua ou vaai atu ia i latou uma lava o le a tutupu mai ia i ma’ua.” Sa vaai o ia i lona aiga faavavau—o lana fanau. Ou te iloa sa toe malamalama o ia i lena taimi, i le taua o le talitonu i le ola mama ma le amio mama. E leai se isi vaaiga e sili atu ona matagofie nai lo se ulugalii sa saunia lelei e tootutuli faatasi i le fatafaitaulaga o le malumalu.

O outou tausaga i Tamaitai Talavou o le a saunia ai outou mo le malumalu. O iina o le a e maua ai faamanuiaga e mafai ona e maua o se afafine faapelepele o le Atua. E alofa lo outou Tama Faalelagi ia te outou ma e finagalo ia outou fiafia. O le auala e faia ai lena mea o le “savali i le ala o le mama”<sup>1</sup> ma “piimau i [a outou] feagaiga.”<sup>2</sup>

Tamaitai talavou, i se lalolagi ua faatupulaia ai le faaleagaina o le